

Mushuj Testamentobiga Jesumundami nishcamunda

¹Jesucristoga Taita Abrahambuj Rey Davidbuj churibunaj churimiga. Jesusbuj ñaubadij causuj taitagunaj shutigunadami caibiga rurusca tiyan. (Mat 1:1)

¹Taita Dios imadash narij rurujobidimi, Parlashca Shimiga ña tiyaga, Parlashca Shimiga Dioscunmiga, chi Parlashca Shimiga Dioslladimiga. ²Tuquida callariquiga Paiga ña Dioscunmiga. ³Paimundami Diosca tuqui ima tiyashcadash rurusca; ima tiyashcamundash Pai illujca, imadash na rurugachu. ⁴Paibimi causiga tiyaga, chi causiga gentegunajca p'unllayachij Luzmiga. ⁵Yana mangabi chi Luzmi p'unllayachin, shinaidi yana mangaga chi Luztaga na vinci pudishcachu. (Juan 1:1-5)

²⁶Elisabet icsa charij tucushca sujta quillabiga, Diosca paibuj ángel Gabrielda Galileabi tiyaj Nazaret pueblobi ²⁷pi c'arinbish na purij Mariamu cachuga. Paiga Rey Davidbuj familiamunda Jozinmi cazarangu, “Ari,” ninucushca gaga.

³⁰ Chimunda angelga, “María, ama mancharichu. Candaga Diosmi mejor c'uyusha agllaga. ³¹Icsa charij tucusha shuj churidami charingui. Paidaga Jesusta shutichingui. ³²Paiga jatun allish Jatun Mandaj Diosbuj Churish nishcami ganga. Mandaj Diosca paidaga ñauba Rey David-da shina jatun mandajta ruranga. ³³Paiga israelgunada na tucuribujta mandagungallami. Pai mandanaga na tucuringachu,” niga. (Luc 1:26-27, 30-33)

²⁰ Shina yuyariguqui, ñash Manduj Diosbuj shuj ángel paibuj sueñobi ricurigallami cashna nisha: “Jozí, ñauba Rey Davidbuj churibunaj churi, ama mancharichu Marian cazarandaga; paiga Diosbuj Espiritumundami icsa charij gan. ²¹Paimi shuj churida mirunga. Chi maraga tuqui juchagunamunda paida crijcunada quishpichinashcamunda, Jesús shutida

Mushuj Testamentobiga Jesumundami nishcamunda

shutichingui,” niga. ²²Tuqui caigunaga Manduj Dios nishcada parluj Isaiasmu Dios parlachishca p'actachunmi shina tucuga: ²³“¡Uyichi! Shuj huarmi pi c'arinbish na purijmi icsa charij tucusha shuj churida mirunga. Paidaga Emanueldami shutichingaguna.” (Cai shutiga, “Diosca ñucuchinmi,” nisha shina nin.) (Mat 1:20-23)

¹Chi p'unllagunami, Roma llactada jatun mandaj Augusto Cesarga, tuqui pai mandashca causajcunada paigunaj shutida apuntachichun manduga. ³Tuquigunami ñauba taitaguna causashca llactabi paigunaj shutigunada apuntachingu rinaga. ⁴Jozish Galileabi tiyaj Nazaret pueblomunda, Davidbuj familia gasha, Rey David huacharishca Judea llactabi tiyaj Belén pueblomu riga. ⁵Paibuj huarmi gana Mariandijmi shutida apuntachingujca chi pueblomu riga. Mariaga icsa charijmiga. ⁶Paiguna Belenbi gaqui, María mirana p'unlla p'actuga. ⁷Pozada huasi na p'actushcamundami paibuj legítimo churidaga huagraguna shayana ucubi miruga. Maradaga maitusha huagra micuna cajonbimi sirichiga. (Luc 2:1, 3-7)

⁹Tuqui gentegunada p'unllayachij cabishcadadi Luzmi cai pachamu chayamuguga. ¹⁴Chi Parlashca Shimiga aicha tucushami, ñucuchin causaga. Shujlla Churi gashcamunda Taitamunda japishca Pai c'uilladi gashcadami ricushcanchi. Pachunlladi c'uyi junda, imadash cabishcada parlujmiga. ¹⁶Pai pachundi c'uyi junda gashcamunda, tuqui ñucuchiquish chi jahua chi jahua Diosbuj alligunada japishcanchi. ¹⁷Diosca mandushcagunadaga Moisesmumi cuga, ashtanbish c'uyidash, cabishca parludash Jesucristomundami japishcanchi. ¹⁸Diostaga riquidadijca pish na ricujchushca; shujlla Churi Dioslladi, shinaidi Taitandij igulda gajmi ñucuchimu rijsi chayachishca. ²⁹Cayundij p'unlla Jesús paibuj

Mushuj Testamentobiga Jesumundami nishcamunda

cuchumu cuchuyamujta Juanchu ricushaga, “Riquichi, Paimigun Dios cachashca Malta Oveja shina; Paiga cai pachabi causujcunaj juchagunadash p'ichajmi gan,” niga. (Jn 1:9, 14, 16-18, 29)

⁹Chi p'unllagunaidimi, Jesusca Galilea llactabi tiyaj Nazaret pueblo-munda llujshisha Juanchujmu chayaqui, Jordán jatiyacubi Juanchuga Jesusta bautizaga. ¹⁰ Jesús yacumunda llujshigusha, jahua pacha pascarijta Diosbuj Espíritu paloma shina paibuj jahuamu uriyamujtash ricuga.

¹¹Shinalladi, jahua pachamunda, “Canmi ñuca c'uyashca churi gangui. Canbimi cushiyani,” nishcashmi uyariga. ¹²⁻¹³Cai q'uijami Diosbuj Espirituga p'ña animalguna tiyashca shitashca pambamu Jesusta pushuga. Chuscu chungu p'unllada chibi gaquimi diablos pandachisha nisha purigugalla. Angelgunash Jesusta sirvigugami. (Mar 1:9–13)

¹⁶Chi q'uijami Jesusca pai ñashca Nazaret pueblomu riga. Samana p'unlla israelgunaj Diosmunda yachana huasimu rij gasha huaiguga. Dios escribichishcagunada liyungu shayariga. ¹⁷Dios nishcada parluj Isías escribishcadami liyachun cugaguna. Chida pascushaga cai escribishcadami japiga, ¹⁸“Manduj Dios agllashcamundami Paibuj Espíritu ñucabi gan. Parlachun cachashcami gani. Imadash na charijcunada Alli Shimi- gunada parlachun, prezu tiyajcunada cacharichichun, na ricujcunada ricujta rurachun, llaquichishca causujcunada cacharichij shina rurachun cachuga. ¹⁹Mandaj Dios perdonana p'unlla chayamujta parlachun cachashcami gani.” ²⁰ Jesusca libroda pilluchishca q'uijaga israelgunaj Diosmunda yachana huasibi ayudajmu cusha tiyariqui tuquigunami Jesusta ricuriaga. (Luc 4:16-20)

Mushuj Testamentobiga Jesumundami nishcamunda

⁹Chimunda Jesús rishami, Israelgunaj Diosmunda yachana huasimu huaiguga. ¹⁰ Chibimi shuj maqui chaquirishca c'ari tiyaga. Fariseoguna imallamundash Jesusta juchachingu munashcamundaga cashna nisha tapugaguna: “Samana p'unllabish shuj ungushcada alliyachinallachari?”

¹¹Shina tapuqui Jesús niga, “¿Cangunamunda maijinsh shujlladi ovejada charisha, samana p'unllabi ut'cubi urmuquiga nachu llushichinguichimu?

¹²¿Ashtanbish shuj gentegarín shuj ovejadash yallimi valin! Shinushaga allida ruranadaga samana p'unllabish rurana allimigun.” ¹³Shinushami chi c'aridaga, “Maquida chutallada churi,” niga. Maquida chutallada churunmi, alliyasha chaishuj maqui laya sanu saquiriga. ¹⁴Shina alliyachijta ricushami, fariseoguna llujshish rishaga ima layash Jesusta huañuchingu nisha tandanucusha parlanucungu callarigaguna.

¹⁵Jesús chida yachushaga chi pushtumunda riga. Taugalladijcnash catisha riqui, tuqui ungushcagunadash alliyachiga. ¹⁶Shinaidi, “Ñucamundaga pimush ama parlunguichichu,” nisha mandaga. ¹⁷Caiga Dios nishcada parluj Isaiasmu cashna nisha parlachishca p'actachunmi shina tucuga: ¹⁸“Caibimi ñucajta ruruj, maijinda ñuca agllashca, ñuca c'uyushca, maijinbi ñuca manchanaidi cushiyani. Ñucaj Espirituda paibimi churusha, shinalladi tuqui llactagunabi tiyujcunamumi Dios munushca shina alli causanadash pai parlunga. ¹⁹Pigunbish na p'iñanucungachu, na caparingachu; pai parlarishcadash ñangunabish pish na uyungachu.

²⁰ P'aquiriguj sucus laya p'aquirichunga shinaidi huañuj nina laya huañuchunga gentegunadaga na saquingachu, ima ura paiga Dios munushca shina allida rurusha tuquida vincingagama. ²¹Shinushaga tuqui llactagunami, ‘Paimi quishpichinga,’ nisha chapangaguna.”

²²Chimundaga yana catishcamunda na ricuj upa c'arida Jesusbujmu

Mushuj Testamentobiga Jesumundami nishcamunda

pushamuga. Chibimi Jesusca paida alliyachiqui, ricuj parluj tucuga.

²³Tuquiguna mancharishcaidi tapunucugaguna, “¿Caichu ganga ñauba taitagunamunda shamuj Rey Davidbuj Churi?” nisha.

²⁴Shina nishcada fariseoguna uyushaga, “Yanagunada Manduj Beelzebú poderda cai c'arimu cushcanmi yanagunada llujshichin,” nigaguna. (Mat 12:9–24)

⁵⁴Pai causushca achpallamundimi chayusha chibimi Diosmunda yachana huasibi yachachingu callariga. Genteguna mancharishcaidi parlanucugaguna cashna nisha: “¿Maibidi cai tuqui yachashcagunada yachugashi? ¿Ima layashi cai pish na ruri pudishcagunadaga rurun? ⁵⁵¿Nachu caicuga carpintero churi; paibuj mamunga Mariagun? ¿Nachu Jacoboj, Jozij, Simonbuj, Judasbuquish huauquigun?” ⁵⁷Shina Jesús parlushcada pillash na uyanachiquiga Paiga niga, “Shuj ladugunabiga Dios nishcada parlujcunaga valichishcamigun. Ashtan quiquinbuj causushca achpabiga shinaidi quiqinpurallabidiquish na valichinchu.” (Mat 13:54-55, 57)

¹⁰ Chi Parlashca Shimiga cai pachabimi tiyaga, Dios Paiyun cai pachada ruruhca gaquish, cai pachamundagunaga pi gashcadash na yachushcamundami na rijsigaguna. ¹¹Paibuj gentegunamumi shamuga, shinash Paibuj gentegunaga na japish nigagunachu. ¹²Ashtangarin mashnalla Paida japijcunamu, Paibuj shutibi crijcunamunga, Diosbuj huahuagunadi tucuchunmi cuga. ¹³Paigunaga na aicha munimunda, na gentegunamunda huacharishcachu, ashtanbish Taita Diosbuj munimundami Paibujti huahuaguna tucunguna. (Jn 1:10-13)

¹³Cesarea Filipo pueblo cuchullamu chayushaga Jesús Paibuj yachagujcunada, “Aichayuj tucushca Churiga ¿pi gashcada gentegunaga

Mushuj Testamentobiga Jesumundami nishcamunda

nigunguna?” nisha tapuga.

¹⁴Shina tapuqui, “Shujcunaga, ‘Bautizaj Juanchumi,’ chaishujcunaga ‘Eliasmí,’ maijingunaga ‘Jeremiasmí,’ na gashaga, ‘Dios nishcada parlujcunamundaminga,’ ningunami,” nigaguna.

¹⁵“Cangunaga, ¿Pi gashcadadi Ñucadaga yuyinguichi?” nisha tapuqui,

¹⁶Simón Pedroga, “Canmi Cristo, causujti Diosbuj Churi gangui,” nisha niga.

¹⁷Chimunda Jesusca, “Can Simón, Jonasbuj churi, cushilla gangui. Pi gentesh canmunga caidaga na ricuchishcachu; ashtanbish jahua pachabi tiyuj Ñuca Taitallami caidaga ricuchishca,” niga.

²¹Chimundapacha Jesús paibuj yachagujcunamu yachachingu callarishaga, “Ñucaga Jerusalén pueblomu rinami gani. Chibimi pushaj yuyijcunamunda, curagunada manduj curagunamundash, Moisesmu mandashcada yachachijcunaj maquimundash manchanaidi llaquida japisha. Shinaidi huañuchichunbish cachushcami gasha. Shinash quinsa p'unllabiga causarishami,” niga. ²⁴Chi q'uipa, Jesusca paibuj yachagujcunada cashna niga: “Maijin Ñucada catingu munujca quiquinbuj munida saquisha, cruzta aparij laya ima llaquidash japisha catimilla. ²⁵Shinushaga maijinsh quiquinbuj causida yalli llaquirijca, na tucurij causidaga mana japingachu. Ashtanbish maijin Ñucada catishcamunda quiquinbuj causida na llaquirijca, na tucurij causida japingami. ²⁶Shuj gentemu cai pachabi tuqui ima tiyujta charij tucushash ¿Imaj alli gangari huañusha quiquinbuj causida chingachishaga? Quiquinbuj causi quishpirichunga imaidash na cui pudingachu. ²⁷Shinusha Ñucaga Aichayuj tucushca Churiga Ñucaj Taitaj c'uilla gashcan angelgunandij shamusha. Chibimi tuquigunamu

Mushuj Testamentobiga Jesumundami nishcamunda

allida ruruscaquish allida cusha; na allida ruruscaquish na allida cusha.
(Mat 16:13-17, 21, 24-27)

¹²Jesús israelgunaj Diosbuj huasimu huaigusha, tuqui chibi c'atujcunada shinaidi randigujcunada huashamu llujshichisha cachuga. Gentegunaj cuchquida cambiusha tiyajcunaj mizagunadash shinaidi tiyarisha palomada c'atuna pushtugunadash tangushtaga. ¹³Chimunda Jesús niga, “Diosbuj Shimibiga ninmi: ‘Ñuca huasiga Diosta mañana huasi nishcami ganga.’ Ashtanbish cangunaga cai huasida shuhuagunaj miticuna ut'cu shinadami rurashcanguichi.”

¹⁴Israelgunaj Diosbuj huasibi na ricujcunama suchugunama Jesusbujmu cuchuyaqui paiga alliyachigallami. ¹⁵Ashtanbish imaura chi curagunada manduj curaguna shinaidi Moisesmu mandushcada yachachijcunash pish na ruri pudishcagunada ruruja ricushaga shinaidi israelgunaj Diosbuj huasibi maraguna, “¡Hosana Rey Davidbuj churi!” nisha caparijta uyushaga p'ñarigaguna. (Mat 21:12-15)

¹Cai tuqui parlanagunada nishca q'uiyaga Jesús Paibuj yachagujcunada cashna niga: ²“Cangunaga ishqui p'unllabi Pascua pishta gashcada yachunguichimi. Chibimi Ñuca, Aichayuj tucushca Churiga cruzbi chacatasha huañuchichun cushca gasha.”

³Chi p'unllagunami curagunada manduj curagunash shinaidi Israelgunada pushaj yuyijcunash curagunada jatun manduj Caifasbuj huasibi tandanucushaga ⁴ima layash pandachisha Jesusta japingaj shinaidi huañuchingaj yuyarinucugaguna. (Mat 26:1-4)

¹Jesusca cai pachamunda Taitaj cuchumu rina uras chayamushtadaga Pascua pishta nariquish chayujllabidi yachushami Paiga cai pachabi gaj

Mushuj Testamentobiga Jesumundami nishcamunda

paibujcunadaga tuqui ratu c'uyujcuga, shinami tucurina p'unllagama c'uyuga. ²Tuta micuna urasmi gaga; Simón Iscariotej churi Judasbuj yuyibiga diabloga Jesusta japichina yuyida ñami churashcaga. ³Jesuca Taita tuquida rurachun Paimu poderda cushcada, shinaidi Diosmunda shamushcada Diosllamundi vueltanashcadash yachushami, ⁴micushca ratu mizamunda jatarisha, jahualla churanada anchuchisha, shuj toalladash chumbillinabi huatariga. ⁵Chi q'uipa shuj batiabi yacuda churusha Paibuj yachagujcunaj chaquida maillushami chumbillinabi huatarishca toallan chaquichingu callariga.

¹²Shinushaga chaquida maillushca q'uipaga, jahualla churanada cutin churarisha, mizamu cutin tiyarishaga, “¿Ñuca cangunada ima ruruscada intindinguichichu?” niga. ¹³“Cangunaga Ñucada, ‘Yachachij, shinaidi Manduj,’ nishaga allidami ninguichi; Ñucaga shinami gani. ¹⁴Shinushaga Ñuca, Manduj shinaidi Yachachij gashash cangunaj chaquida mailluquidijca, cangunash caishuj chaishujmi chaquida maillanucunanguichi. ¹⁵Ñuca rurusca layada cangunash rurachunmi shina rurusha ricuchishcani. (Jn 13:1-5, 12-15)

²⁶Shina micuguquimi Jesuca tandada japisha Diosta, “Diosolopai,” nishca q'uipa yachagujcunamu, “C'aigachi. Miquichi. Caimigun Ñucaj aicha,” nisha chaubisha cuga.

²⁷Chi q'uipa shuj copada japisha Diosta, “Diosolopai,” nisha pai yachagujcunamu cuga. “Cai copamunda tuquiguna ubiyichi. ²⁸Caimi Ñucaj yaur. Cai yaurgunmi Ñuca ‘ari,’ nishcada p'actachingu ricuchisha. Taugagunamundami cai yaurga jichushca ganga, paigunaj juchagunada p'ichangaj. (Mat 26:26-28)

Mushuj Testamentobiga Jesumundami nishcamunda

¹⁴Pascua pishtaj shuj p'unlla jualtaguqui chi chaubi p'unlla shinadami Pilatoga israelgunamu, “¡Caibimi cangunaj jatun mandujta charinguichi!” niga.

¹⁵Shinash paigunaga, “¡Llujshichi, llujshichi! ¡Cruzbi lavusha huañuchilla!” nisha capariga.

Chimunda Pilatoga, “¿Cangunaj jatun mandujtachu chacatashari?” nisha tapuga.

Chimunda curagunada manduj curagunaga, “Ñucuchiga jatun manduj Cesarlladami charinchi,” nigaguna.

¹⁶Chimundami Pilatoga cruzbi lavungu richun Jesusta paigunamu cuga. Shina cuquimi pushusha rigaguna. (Jn 19:14-16)

²¹Cristoga ima juchadash na rurajchuga. Shinash ñucuchij cauzamunda Diosca Cristodaga juchayuj shinada rurashami, ima juchachinash illuj tucunadami Diosca ricuchishca. (2 Cor 5:21)

⁹Ñucuchij Mandaj Jesucristo cushca alligunadaga yachunguichimi. Paiga tuquida charij gashash ashtan cangunada c'uyasha charijcuna tucuchunmi imadash na charij tucuga. (2 Cor 8:9)

²²“Paiga ima juchadash na rurugachu, shinaidi shimin pidash na engañagachu.” ²³Rimaguquish paiga na rimushallami imadash nij gaga; llaquichiguquish na imadash nisha manchachijchuga. Ashtangarin cabishcada ruruj Juezmumi Pailladi mingushca. ²⁴Ñucuchi juchabuj ña huañushca gachunbish cabishcada rurasha causachunbish Pailladimi ñucuchij juchagunada paibuj cuerpobi apasha cruzbi huañuga. Cristo chugrichishcagunanmi alliyachishcaganguichi. ²⁵Cangunaga ñaubaga

Mushuj Testamentobiga Jesumundami nishcamunda

chingarishca ovejaguna shinami puriganguichi. Cununga Michijmush cangunaj yuyigunada Chapagujmumi vueltushcanguichi. (1 Ped 2:22-25)

³Tuquimunda yalliga, ñuca ima laya japishcadami cangunamunga yachachigani: Dios escribichishcabi nishca shinami, Cristoga ñucuchij juchagunamunda huañuga. ⁴Shinaidi Dios escribichishcabi nishca shinami, pambushca gashash quinsa p'unllabi causariga. (1 Cor 15:3-4)

¹Sarungunaga ñucuchij ñauba taitagunamu tauga cutin tuqui laya ninagunan parlachunga Diosca Pai nishcada parlujcunamumi parlachishca, ² ashtan cunun cai tucuri p'unllagunabi ñucuchimu parlachunga Paibuj Churidami cachashca. Paimundami cai pachabish jahua pachabish tuqui ima tiyashcada rurashca, shinaidi Paimumi tuqui japinada cuga. ³Dios c'uilla p'alaniguj Pai ima shina gashcadash Paibuj Churilladimi ricuchin. Shinaidi Pai tuquida ruri pudijlla parlarishcanmi tuquida charirigun. Ñucuchij juchagunada p'ichashca q'uipaga jahua pachabi Dios tiyana alli ladubimi tiyariga. (Heb 1:1-3)

⁵Cristo Jesús yuyashca shinaidimi cangunash yuyana ganguichi: ⁶Paiga Dioslladi gashash, jatun Dios igul gachun na cabishcada yuyaga. ⁷Ashtangarin Pailladi ima shina gashcada saquisha, ñucuchi shina huacharisha aichayuj tucushaga sirvij tucuga. ⁸C'arimu rijchaj gashaga Pailladi yanga tucuga, chacatashca huañungu gashash huañungagama cazuj tucuga. ⁹⁻¹¹Chimundami Diosca Paidaga tuquibi yalli jatun valijta ruraga, tuqui shutigunada yalli c'uilladi shutida Paimu cuga. Shinuquiga tuqui jahua pachabish, cai pachabish, ucu pachabish gajcuna Manduj Jesús shutibi cunguringa, shinaidi tuqui laya shimin, “Jesucristoga Mandujlladimi,” nisha parlanga, Taita Dios, “Alli c'uillami gangui,” nishca gachun. (Filip 2:5-11)

Mushuj Testamentobiga Jesumundami nishcamunda

⁴⁻⁵Ñuca Juanchumi, Asia llactabi gaj canchis pueblobi tandanucushca crijcunamu escribini. Cununbish sarunbish tiyaj, q'uipallash shamuna Diosmundash, Pai mandusha tiyarinaj ñaubuqui gaj canchis espiritugunamundash, shinaidi Jesucristomundash Dios cushca alligunash c'uilla causish cangunan gachun. Jesucristoga cabishcallada parlujmi, huañushcagunapuramunda ñaubushadi causarijmi, cai pachabi tiyaj jatun mandujcunada Mandujmi. Paiga ñucuchida c'uyashami Paibuj yaurda jichusha juchabi huatashca laya gajcunadaga cacharichiga.

⁶Paimi ñucuchidaga mandajcunada rurusha, Paibuj Taita Diosbuj curaguna gachun rurashca. Paidaga ima urash na tucuringama, “C'uillami gangui, tuquida ruri pudijmingui,” nishca gachun. Shina gachun.

⁷Riquichi; Cristoga p'uyubimi ña shamugun! Tuquigunami Paidaga ricungaguna; Paida lansan tujsijcunash ricungami; cai pachabi tiyaj tuqui laya gentegunami Paimunda shungubi juactarisha huacungaguna. Ari, shina gachun.

¹²Chimunda pi ñucan parlarigushcada ricungu vueltarigani; shina vueltarishaga curin rurushca canchis candelerogunadaga michayujtami ricugani. ¹³Chi canchis candelerogunaj chaubibiga, Aichayuj tucushca Churimu rijchujtami ricugani; chaqui pambagama shuj churanallada churashca, curimunda rurushca chumbidash pecho quinribi chumbillishcami gashcaga. ¹⁴Paibuj uma juacchash, yuruj millma laya, rasu laya yurajlladimi gaga; shinaidi Paibuj ñahui lulungunash nina rupaj shinami ricuriga. ¹⁵Paibuj chaquigunash jurnubi rupachisha llambushcama laya p'alanigujta rurushca broncemu rijchajmiga. Pai parlarishcash manchanaidi yacu jatirisha bullanij shinami gaga. ¹⁶Paibuj alli ladu maquibiga

Mushuj Testamentobiga Jesumundami nishcamunda

canchis luzerogunadami chariga; Paibuj shimimundash ishqui jiluyuj puntalladi espadami llujshimuguga; pachun rupi shitashca shinami Paibuj ñahuish indi laya p'alaniguga. ¹⁷Paida ricusha Paibuj ñaibuqui huañushcama laya urmugani, shinash Paibuj alli ladu maquida ñucaj jahuabi churusha cashna niga: “Ama mancharichu. Callarichijquish, Tucurichijquish Ñucami gani. ¹⁸Shinaidi causujmi gani. Huañugani, shinash cununga ima uragamash na tucuribuj causidami causani. Shinaidi huañimundash huañushcaguna maibi tiyashca Hadesmundash pascana llavegunadaga Ñucami charini. (Apoc 1:4-7; 12-18)

¹Chi mandusha tiyarinabi Tiyajbuj alli lado maquibiga, shuj cururashca papelbi ñaubujmush huashamush escribishca, shinaidi canchis sellogunan ichcushcada charijtami ricugani. ²Shinaidi poderda charij shuj angelda ricugani; chi ángel jinchida caparishaga, “¿Cururushca papelda pasquibuj, shinaidi selloscagunada lliquishtibujca pidi cabi ganga?” nisha tapuga.

³Jahua pachabish cai pachabish achpa ucubish chi cururushcada pascunguquish ima tiyashcada ricungaquish pish na pudigachu.

⁴Shinushaga chi cururashca papelda pasquibuj ima tiyashcada riquibujca cabijlladash na japishcamundami, ñucaga manchanaidi huacugani.

⁵Chimunda yuyijcunamunda shujca, “¡Ama huaquichu! Judaj huahua-gunapuramunda León nishcaga vincigami. Paiga ñauba Rey Davidbuj sapimunda ñaj laya paibuj huahuagunaj huahuamundami gan. Paimi chi cururushca papelda pascungu canchis selloscada lliquishtanguquish pudinga,” niga.

⁶Chimundaga chi yuyijcunaj shinaidi causida charij chuscugunaj chaubibi, mandusha tiyarina cuchubimi shuj Malta Oveja shayajta

Mushuj Testamentobiga Jesumundami nishcamunda

ricugani; chiga huañuchishca layami ricuriga. Canchis cachugunada, canchis ñahuigunadami chariga; chigunaga cai illujta pachamun Dios cachushca Paibuj canchis espiritungunami gan. ⁷Malta Ovejaga mandusha tiyarinabi Tiyajbujmu cuchuyashaga alli ladu maquimunda chi cururushca papelda japiga. ⁸Chi cururushcada japiquiga, causida charij chuscuguna, ishqui chungu chuscu yuyijcunash Malta Ovejaj ñaubuquimi cungurigaguna. Tuquigunami tocana arpagunada charigaguna, shinaidi curi copagunabi incienso jundadami apagaguna; chigunaga Diosbujlla gajcuna Diosta mañushcagunadami ricuchigun.

⁹Shinaidimi cai mushuj cantudash cantagaguna:

“Canllami, huañuchishca gasha, Cambuj yaurda jichushcan, tuqui laya gentegunamunda, tuqui laya shimibi parluj, tuqui pueblo tuqui llactagunamunda gaj gentegunada Diosbuj gachun randishcangui. Chimundami cururushca papelda japisha, selloshcagunada pascungajca Canlla cabingui.

¹⁰ Paigunamundami mushuj mandanada rurasha ñucuchij Diosbujta rurachun mandujcuna shinaidi curaguna gachun ruragangui; shinami cai pachada mandungaguna.”

¹¹Chi q'uipa ricushaga, mandasha tiyarinaj, causida charijcunaj, shinaidi yuyijcunaj muyundiqui, huaranga huarangaguna, maida na cuintibuj tauga angelguna parlarijtami uyugani. ¹²Paiguna jinchida caparishaga, “¡Huañuchishca Malta Ovejaga, poderda charij, tuquida charij, tuquida yachaj, imadash pudijlla, allibi churushca, c'uillami nishca, tuquimunda yalli ‘Jatunmi gangui,’ nishcada Paiga japinaidimi cabin,” nigagunami.

¹³Shinaidimi jahua pachabi, cai pachabi, achpa ucubi, shinaidi jatun yacu cuchabish, Dios imalla rurushcagunash, tuqui chigunabi tiyashcagunash

Mushuj Testamentobiga Jesumundami nishcamunda

cashna nijtami uyugani: “Mandusha tiyarinabi Tiyajta, Malta Ovejadash, ‘Ima urash na tucuringama tuquimunda yalli jatunmi,’ allibi churashcash, c'uilla gashcash, poderda charij nishcash gachun,” niquimi, ¹⁴causida charij chuscugunaga, “Shina gachun,” shinaidi ishqui chungu chuscu yuyijcunash cungurishaga, “Allimi gangui,” nigugagunami. (Apoc 5:1-14)

¹¹Chimundami jahua pacha pascarishcada shinaidi yuruj caballoda ricugani. Chi caballobi sicujca Cabishcada ruru, chidadi P'actachij nishca shutimi gaga. Pai maijinda llaquichishabish tacanucushabish cabishcadami rurun. ¹²Paibuj ñahuigunash nina pulun mandaj layami gaga. Paibuj umabish tauga coronagunada churashcami gashcaga, shinaidi pi mana yachushca pailla yachushca shutidami escribishcada chariga. ¹³Yaurgun tinishca churanada churushcami gaga. Paibuj shutish Diosbuj Shimi nishcami gaga. ¹⁴Paidami jahua pachamunda soldadoguna yuruj caba-llogunabi linshu yurajlla ñutu lino linsuda churarishca catisha rigaguna. ¹⁵Cai pachabi tiyaj llactagunada chugrichingumi Paibuj shimimunda shuj jilulladi espada llujshimuguga, shinaidi jirru varanmi Paiga mandunga. Pailladi vinoda rurusha capij shinami uvada chaquin sarunga. Chi vinoga tuquida ruri pudij Dios manchanaidi p'iñarisha llaquichinadami shina nin. ¹⁶Paibuj jahua churanabi changa quinribi, “Mandujcunadash yalli jatun Manduj shinaidi amogunadash yalli jatun Amomi gan,” nisha escribishcadami chariga. (Apoc 19:11-16)

¹²“Riqui. ¡Ñucaga ñallami shamusha! Tuquigunamu imalla rurushcamunda japina gashcada cungajmi apushca shamusha. ¹³Ñucami callarij Alfa shina tucurij Omega shina gani; callarichijquish tucurichijquishmi gani.”

Mushuj Testamentobiga Jesumundami nishcamunda

¹⁴Causida cuj yuramunda japinadadi charingaj, pueblomu pungugunada huaigunguquish sundij churanada tajshuj shina linsharijcunaga cushi-yachishcami gan. ¹⁵Ashtanbish milli achcu shinagunaga: yumbugunash, piyunbish siririjcunash, huañuchijcunash, musrhagunada ‘allimi gangui’ nijcunash, llagma ganada c'uyusha tuqui llagmajcunash huashabimi saquiringaguna.

¹⁶“Ñuca Jesusmi, crijcuna tandanucushcagunabi caigunada cangunamu yachi chayachichun Ñucaj angelda cachugani. Ñucami Rey Davidbuj sapimunda ñaj laya paibuj huahuagunaj huahua gani, shinaidi p'unllayanaj ricurij p'alaniguj luzerosh gani.” ¹⁷Diosbuj Espiritush Malta Ovejaj huarmishmi Jesustaga, “¡Shami!” nigunguna. Maijinbish cai librobi nishcagunada uyujca Paidaga, “¡Shami!” nichun. Maijin yacunachijca munushaga imadash na cushalla causida cuj yacuda ubiungaj shamuchunlla.

²⁰ Caigunada yachi chayachijca, “Ari, ñallami shamusha,” ninmi. Shina gachun. ¡Shamilla, Manduj Jesús!

²¹Manduj Jesusbuj cushca alliguna tuquigunan gachun. (Apoc 22:12-17, 20-21)